

ԵՐԵՎԱՆԻ ՄԱՍԻՍԻԱՅԻ ՓԱՏԱԿԱՆ ԿԱԹՈՂԻԿՈՍՈՍՈՒՆ

ՄԱՅՐ ԱԹՈՒ ՍՈՒՐԲ ԷԶՍԻԱՃՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

ԸՆԴՈՒՆԵԼՈՒԹՅՈՒՆՆԵՐ ՎԵՇԱՐԱՆՈՒՄ Ամենայն Հայոց Կաթողիկոսն ընդունեց

7 սեպտեմբերի

ՀՀ-ում Պերմանիայի դեսպանին



Ն. Ս. Օ. Տ. Տ. Գաբրիել Երկրորդ Ծայրագույն Պատրիարք եւ Ամենայն Հայոց Կաթողիկոսն ընդունեց Հայաստանի Հանրապետությունում իր դիվանագիտական առաքելությունն ավարտած Պերմանիայի Դաշնային Հանրապետության արտակարգ եւ լիազոր դեսպան Սիխայել Բանցիաֆին։

Հանդիպմանը Նորին Սրբությունը, խոսելով հայ ժողովրդի առջեւ ծառացած արտաքին եւ ներքին մարտահրավերների մասին, իր երախտագիտությունը հայտնեց Պերմանիայի իշխանություններին՝ Հայաստանին այս ծանր ժամանակաշրջանում աջակցելու համար։ Ամենայն Հայոց Կաթողիկոսը նաեւ շնորհակալություն հայտնեց դեսպանին՝ Հայաստանում իրականացրած արդյունավետ առաքելության համար։


Իր հերթին՝ դեսպանը գոհունակությամբ նշեց, որ իր պաշտոնավարման ընթացքում առիթ է ունեցել ճանաչելու հայ ժողովրդի բազմադարյա հարուստ մշակույթը եւ հաղորդ դառնալու Հայաստանի պատմական ու հոգետր արժեքներին։

Ջրույցի ընթացքում անդրադարձ կատարվեց նաեւ տարածաշրջանում խաղաղության ու կայունության հաստատման կարևորությունը եւ այդ գործում ԵԱՀԿ Մինսկի խմբի դերակատարությանը։

Հանդիպման ավարտին Ամենայն Հայոց Հայրապետը դեսպանին մաղթեց նորանոր հաջողություններ իր հետագա գործունեության մեջ։

Իրանի Իսլամական Հանրապետության դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում Իրանի Իսլամական Հանրապետության արտակարգ



եւ լիազոր դեսպան Աբբաս Բադախշան Զոհուրին։

Վեհափառ Հայրապետը ողջունեց դեսպանի այցը Մայր Աթոռ եւ իր օրհնությունն ու բարեմաղթանքները փոխանցեց նրան։

Ամենայն Հայոց Կաթողիկոսը շնորհակալություն հայտնեց Իրանի Իսլամական Հանրապետությանը՝ համավարակի, պատերազմի եւ հետպատերազմյա դժվարին ժամանակաշրջանում Հայաստանին մշտապես զորակցություն ցուցաբերելու համար։

Նորին Սրբությունը կարեւորեց երկու ժողովուրդների բազմադարյա բարեկամական կապը՝ հույս հայտնելով, որ ապագայում այն առավել կխորանա ու կսերտանա։

Իսկ դեսպան Աբբաս Բադախշան Զոհուրին, անդրադարձ կատարելով տարածաշրջանային իրավիճակին, ընդգծեց հակամարտությունների խաղաղ կարգավորման անհրաժեշտությունը։ Դեսպանը նաեւ նշեց, որ Իրանի համար շատ կարեւոր է հզոր եւ տնտեսապես զարգացած հարեւան ունենալը՝ նկատի առնելով Հայաստանը։

Հանդիպմանը զրուցակիցներն անդրադարձան նաեւ Մայր Աթոռի եւ Իրանի Իսլամական Հանրապետության միջեւ առկա փոխգործակցային հարաբերություններին՝ կարեւորելով մշակույթի ոլորտում համագործակցությունը, կրոնական երկխոսությունը, միջկրոնական համաժողովների կազմակերպումը։

8 սեպտեմբերի

ՀՀ-ում Ֆրանսիայի դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում իր դիվանագիտական առաքելությունն ավարտող Ֆրանսիայի Հանրապետության արտակարգ եւ լիազոր դեսպան Ջոնաթան Լաքոտին։

Ողջունելով դեսպանին՝ Նորին Սրբությունը ընդգծեց, որ վերջինիս արդյունավետ պաշտոնավարման ընթացքում առավել ընդգծվեցին հայ-ֆրանսիական բարեկամական կապերը։ Ամենայն Հայոց Կաթողիկոսը, ի դեմս դեսպան Ջոնաթան Լաքոտի, իր երախտագիտությունը հայտնեց Ֆրանսիայի իշխանություններին՝ համավարակի ընթացքում, ինչպես նաեւ պատերազմի ու հետպատերազմյա ծանր օրերին Հայաստանին եւ հայ ժողովրդին բերած աջակցության եւ զորակցության համար։

Հանդիպմանը Նորին Սրբությունը նաեւ հույս հայտնեց, որ Ֆրանսիան՝ իբրեւ ԵԱՀԿ Մինսկի խմբի համանախագահող երկիր, իր նպաստը կբերի Լեռնային Ղարաբաղի խնդրի արդարացի կարգավորման գործում։

Իր հերթին՝ դեսպան Ջոնաթան Լաքոտը ջերմ ընդունելության համար երախտագիտություն հայտնեց Վեհափառ Հայրապետին եւ ընդգծեց, որ իր առաքելությունը Ֆրանսիայի եւ Հայաստանի միջեւ ձեւավորված բարեկամական հարաբերությունների պահպանումն ու շարունակական ընթացքի ապահովումն են։

Ջրույցի ընթացքում դեսպանն արձանագրեց նաեւ, որ Լեռնային Ղարաբաղի հակամարտությունն առաջացրել է բազմաթիվ հարցեր, որոնք դեռեւս չեն արժանացել միջազգային հանրության պատշաճ ուշադրությանն ու գնահատանքին։ Այս առնչությամբ դեսպան Ջոնաթան Լաքոտը հավաստիացրեց Նորին Սրբությանը, որ Ֆրանսիան շարունակ



կելու է ջանքեր գործադրել խնդրի արդար եւ խաղաղ կարգավորման համար։

Հանդիպման ավարտին Ամենայն Հայոց Հայրապետը դեսպանին մաղթեց նորանոր հաջողություններ իր հետագա գործունեության մեջ։

10 սեպտեմբերի

Արցախի Հանրապետության արտաքին գործերի նախարարին



Ամենայն Հայոց Կաթողիկոսն ընդունեց Արցախի Հանրապետության արտաքին գործերի նախարար Դավիթ Բաբայանին՝ ուղեկցությամբ Արցախի թեմի առաջնորդ Վրթանես եպս Աբրահամյանի։

Նորին Սրբությունը իր գնահատանքը բերեց նախարարին՝ Մայր Աթոռում տեղի ունեցող միջազգային համաժողովին իր մասնակցությունը բերելու համար, որով հնարավորություն ընձեռվեց ժողովականներին

համապարփակ ներկայացնելու Արցախի առջեւ ծառացած ներկայիս մարտահրավերները եւ հիմնախնդիրները։ Վեհափառ Հայրապետը տեղեկացրեց նախարարին, որ այս շրջանում քույր եկեղեցիների ներկայացուցիչները եւս համապատասխան աշխատանքներ են իրականացրել՝ միջազգային ատյաններում բարձրաձայնելու Արցախի իրավունքները։

Արցախի եւ Հայաստանի Հանրապետության դեմ։ ➔ էջ 2

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց

Արցախի Հանրապետության արտաքին գործերի նախարարին

← Էջ 1

Հանդիպմանը Նորին Սրբությունը ընդունեց նաեւ, որ Եկեղեցիների համաշխարհային խորհրդի գլխավոր քարտուղարին եւ Եվրոպական Եկեղեցիների համաժողովի նախագահին տեղեկացվել է Մայր Աթոռի կողմից Արցախի հոգեւոր-մշակութային արժեքների պահպանման գործում իրականացվող աշխատանքների մասին:

Նախարար պարոն Դավիթ Բաբայանն իր խոսքում ընդգծեց, որ Արցախը մշտապես զգացել է Հայ Առաքելական Ս. Եկեղեցու աջակցությունը եւ մեծապես կարեւորել ու գնահատել այն: Վերջինս նաեւ ընդգծեց ման համաժողովների կազմակերպման կարեւորությունը, որոնց միջոցով հնարավոր է Արցախն առավել ճանաչելի դարձնել միջազգային տարբեր հարթակներում:

«Բարնաբաս» բարեգործական հիմնադրամի ներկայացուցիչներին



Ամենայն Հայոց Կաթողիկոսն ընդունեց «Բարնաբաս» միջազգային հիմնադրամի տնօրեն քորեպիսկոպոս Պատրիկ Սուքեռյանին, տիկին Ռոզմարի Սուքեռյանին, հիմնադրամի ծրագրերի պատասխանատու Քարոլին Քըրուլեյքին եւ հիմնադրամի Սանկտ Պետերբուրգի ներկայացուցիչ Բորիս Կոստինին:

Վեհափառ Հայրապետը, ողջունելով հիմնադրամի ներկայացուցիչներին, ընդգծեց, որ նրանց մասնակցությունը Մայր Աթոռ Ս. Էջմիածնում անցկացվող «Միջազգային կրոնական ազատություն եւ խաղաղություն» խորագրով միջազգային համաժողովին եւս մեկ անգամ վկայում է վերջիններիս բարեսեր վերաբերմունքը Արցախի եւ հայ ժողովրդի

նկատմամբ հատկապես այս դժվարին օրերին: Հանդիպմանը Նորին Սրբությունը նաեւ իր երախտագիտությունը հայտնեց «Բարնաբաս» բարեգործական հիմնադրամին՝ տեղահանված արցախցիներին օգնելու եւ Իզմիրլյան ԲԿ-ում 44-օրյա պատերազմում վիրավորում ստացած զինծառայողների բուժման նպատակով վերականգնողական կենտրոնի ստեղծման համար:

Հիմնադրամի տնօրեն քորեպիսկոպոս Պատրիկ Սուքեռյանը շնորհակալություն հայտնեց Ամենայն Հայոց Կաթողիկոսին ջերմ ընդունելության համար՝ հաստատելով, որ մասնօրինակ բարեգործական ձեռնարկները շարունակական բնույթ են կրելու՝ ի նպաստ Արցախի եւ Հայաստանի:

Հայ Եկեղեցու «Սուրբ Սահակ – Սուրբ Մեսրոպ» ժառանգության Բարոնուհի Քերոլայն Քոֆսին



ներդրած ջանքերը միջազգային տարբեր առաքելություններում արցախահայության ազատ եւ անկախ ապրելու իրավունքի պաշտպանության, ինչպես նաեւ Արցախի հայորդիներին մշտապես աջակցություն եւ զորակցություն ցուցաբերելու գործում:

Հանդիպմանն Ամենայն Հայոց Կաթողիկոսը, ի գնահատումն բարոնուհի Քերոլայն Քոֆսի՝ հայ ժողովրդին ու Հայ Եկեղեցուն մատուցած զոլարժան ծառայությունների, նրան պարգևատրեց Հայաստանյայց Առաքելական Ս. Եկեղեցու «Սուրբ Սահակ – Սուրբ Մեսրոպ»

պատվո բարձր շքանշանով:

Իր հերթին՝ Քերոլայն Քոֆսը խորին շնորհակալություն հայտնեց Հայոց Հայրապետին՝ ման բարձր պատվի արժանացնելու համար: Բարոնուհին Նորին Սրբությանը հավաստիացրեց, որ միջազգային տարբեր հարթակներում շարունակելու է փաստերի հիման վրա բարձրաձայնել Արցախի հայության եւ հայկական հոգեւոր-մշակութային ժառանգության նկատմամբ Ադրբեջանի կողմից իրականացվող ոճրագործությունների մասին:



«Միջազգային կրոնական ազատություն եւ խաղաղություն» խորագրով երկօրյա միջազգային համաժողովը Մայր Աթոռում


Այսօր, 9-ին Մայր Աթոռ Ս. Էջմիածնի Վեհարանի համդիսությունների սրահում, օրինությամբ Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսի եւ նախաձեռնությամբ Մայր Աթոռի քարոզչական կենտրոնի ու Արցախի հոգեւոր-մշակութային ժառանգության պահպանման հանձնախմբի, մեկնարկեց «Միջազգային կրոնական ազատություն եւ խաղաղություն» խորագրով երկօրյա միջազգային համաժողովը:

Համաժողովին մասնակցում էին Մայր Աթոռի միաբաններ, քույր Եկեղեցիների եւ քրիստոնեական կառույցների ներկայացուցիչներ, գիտնականներ ու հասարակական գործիչներ տարբեր երկրներից:

Կոնֆերանսի սկզբում Մայր Աթոռ Ս. Էջմիածնի Արցախի հոգեւոր-մշակութային ժառանգության հարցերով հանձնախմբի ատենապետ Վիգեն արք. Ալեքսանյանը ներկայացրեց իրավիճակը մեկ րոպե լռությամբ հարգելու արցախյան 44-օրյա պատերազմի անմեղ զոհերի հիշատակը: Այնուհետեւ համաժողովի մասնակիցներին իր պատգամն ու օրհնությունը փոխանցեց Գարեգին Երկրորդ Ամենայն Հայոց Կաթողիկոսը:

«Համաժողովի հարգելի մասնակիցներ, Ուրախ ենք ողջունելու ձեզ հայոց հոգեւոր

կենտրոն Մայր Աթոռ Ս. Էջմիածնում եւ բերելու հայրապետական Սեր օրհնությունը «Կրոնական ազատություն եւ խաղաղություն» խորագրով այս համաժողովի անցկացման



առթիվ: Գնահատելի են Մայր Աթոռ Ս. Էջմիածնում գործող Արցախի կրոնամշակութային արժեքների պահպանության բաժնի եւ հանձնախմբի ջանքերը՝ այստեղ մեկտեղելու ազատության ու խաղաղության վեհ գաղափարների համար իրենց ծառայությունն աշխարհում բերող նվիրյալների, որոնց համատեղ ջանքերի համագումարը մեծապես կնպաստի այդ գաղափարների վերարժեւորմանն ու ամրապնդմանը:

Ազատության եւ խաղաղության գաղափարները մարդկության պատմության տարեկիցներն են եւ այսօր էլ շարունակում են մնալ արդիական, մանավանդ երբ աշխարհի տար-

բեր մասերում բռնությունների, հակամարտությունների, պատերազմների առկայությունը հաճախ փորձ է արվում հիմնավորել ազատության կամ խաղաղության հաստատման կեղծ

այլոց ազատությունների հանդեպ վտանգների ու սահմանափակումների բացառումով: Ազատության գաղափարի ըմբռնումները, ինչպիսի հիմքի վրա էլ կառուցվեն, անվի-



օրակարգերով: Քրիստոնեական մտածողության համաձայն՝ ազատությունը դրսեւորվում է Բարձրալի կամքի հետ մարդկային կամքի ներդաշնակությամբ: Այս համոզումով է Պողոս առաքյալը հայտարարում. «Որ որ Տիրոջ Հոգին է, այնտեղ ազատություն է» (Բ Կորնթ. 3. 17): Հիմնով, առանց ազատության եւ խաղաղության գաղափարների վերաբերյալ կրոնական վեճ ըմբռնումի՝ հնարավոր չէ հասնել մարդկային ազատությունների ու իրավունքների ճշգրիտ ընկալմանն ու իրացմանը:

Աշխարհիկ հասկացողությամբ՝ ազատությունը մեկնաբանվում է որպես անձի կամարտահայտման եւ ազատ գործելու իրավունք՝

ճարկելիորեն պիտի կոչված լինեն ծառայելու մարդկանց ներդաշնակ ու խաղաղ համակեցության ապահովմանը, սուրբգրային «յերկիր խաղաղութիւն, ի մարդիկ հաճութիւն» (Ղուկ. 2. 14) պատգամի իրագործմանը: Այս իմաստով ցանկանում ենք բարձրաձայնել Սեր երջանկահիշատակ նախորդներից Վազգեն Ա Ամենայն Հայոց Կաթողիկոսի խոսքերը խաղաղության մասին. «Ամեն բանի մասին կարելի է տարակարծիք լինել եւ վիճել. խաղաղության հրամայականը, սակայն, վեր պետք է լինի ամեն վեճից եւ դառնա բոլորի համար մտածելու եւ գործելու զերագույն կանոն:

→ Էջ 4-5

ԱՅՐԻՎԱՆԷ (ԴԵՂԱՐԴԱՎԱՆԷ) ԵՒ ՍՈՒՐԲ ԴԵՂԱՐԴ

Սկիզբը՝ թիվ 16

Գեղարդավանքի ժայռափոր կառույցները միջնադարյան հայկական ճարտարապետության գլուխգործոցներ են:


Վանական համալիրն իր գոյության ընթացքում բազմիցս ավերվել է ինչպես արտաքին հարձակումների, այնպես էլ երկրաշարժերի հետևանքով, ապա վերակառուցվել: Խորհրդային իշխանության տարիներին (1934, 1940 եւ 1960–1961 թթ.) Գեղարդավանքը հիմնավորապես վերանորոգվել է:

1635–1675 թթ. Գեղարդավանքի վանահայրն էր Դավիթ վարդապետ Պռոշյանը, որի օրոք թիֆլիսեցի Սուլե Չիթախյանը 1655 թ. նորոգել է Կաթողիկեն եւ վանքին նվիրել արծաթե կանթեղ: 1679 թ. հունիսի 4-ի Գառնիի ավերիչ երկրաշարժից Գեղարդավանքն ավերվել է, լեռներից պոկված ու թափված ժայռաքեկորները ծածկել են համալիրի շինությունները: 1684 թ. Գեղարդավանքը մաքրել են փլվածքներից, նորոգել վնասված շինությունները, կառուցել բրգավոր պարիսպը եւ նրան կից բնակելի ու տնտեսական կառույցները: 1687 թ. պատրաստել են սուրբ գեղարդի նոր, արծաթե պահարան՝ կրկնելով հնի արձանագրությունը: Պահարանի դռնակների վերելում «Ավետման» տեսարանն է, դիմացը՝ հրեշտակը, ներքեում՝ «Խաչելությունը», դիմացի փեղկին՝ ս. Գրիգոր Ա Լուսավորիչը: Ոսկերիչ-քանդակագործներ Գրիգորը եւ Սարգիսը կերպարներին տվել են ճգնավորի տեսք՝ բնական շարժումներով ու կեցվածքով: 1698 թ. քանաքեռցի ոսկերիչ Ավետը պատրաստել է պահարան՝ Գեղարդավանքում պահվող նույն տապանի փայտից: Դռնակներին Հակոբ Մծբնացու եւ նրա դիմաց հրեշտակի քանդակներ են: Գեղարդավանքի վանահայր Դանիել վարդապետ Պռոշյանը 1708 թ. կառուցել է վանքի արեւմտյան կողմի կամարակապ դարպասը: 1715 թ. հայ վաճառականները Գեղարդավանքին են նվիրել եպիսկոպոսական մարգարտաշար թագ: Վանահայր Պետրոս Զահկեցին 1733–1739 թթ. նոր հողեր է ձեռք բերել վանքի համար: XVIII–XIX դդ. Գեղարդավանքն ունեցել է այգիներ, ջրաղացներ, ձիթհաններ, ընդարձակ կալվածքներ Նորազավիթ, Նորք, Տաճարաբակ (այժմ՝ Ձորաղբյուր) գյուղերում, ստացել Գողթ գյուղի տարեկան բերքի կեսը: 1834 թ. վանքը նորոգել է Կաթողիկոս Հովհաննես Ը Կարբեցին:

1840 թ. հուլիսի 2-ի Ակոռիի մեծ երկրաշարժից վնասվել են Գեղարդավանքի Կաթողիկեն եւ խցերը: Նույն տարում վանահայր Օհան վարդապետը վանքի շրջակայքում մրգատու ծառերով մեծ այգի է տնկել: Միջայել Ձամոյան վարդապետը 1868 թ. Գողթ եւ շրջակա մյուս գյուղերից նոր կալվածքներ է գնել եւ շինել վանքի ճանապարհը: Կաթողիկոս Գեորգ Դ Կոստանդնուպոլսեցու հրամանով վանահայր Ռաֆայել Շիրակացին 1870-ական թթ. կառուցել է Գեղարդավանքի դպրոցը: Կաթողիկոս Վազգեն Ա Պալճյանի հայրապետության տարիներին վանքի բակի արեւելյան կողմում աղբյուր է կառուցվել (1958 թ., ճարտարապետ՝ Ռ. Իսրայելյան), 1960 թ. վերակառուցվել է դարպասը, 1968 թ. համալիրի արեւմտյան հատվածում կառուցվել է վանատան երկհարկանի շենքը, բարեկարգվել վանքի տարածքը: 1978 թ. բացվել է վերակառուցված սեղանատունը, վերանորոգվել են պարսպին կից շինությունները, Կաթողիկեի խորանում տեղադրվել է նոր բեմասեղան (ճարտարապետ՝ Ս. Քյուրբչյան): Պետական միջոցներով նորոգվել է Երեւան–Գառնի–Գեղարդ խճուղին, Գեղարդավանքի վիմափոր կառույցները ներթափանցող ստորգետնյա ջրերից պաշտպանելու համար վանքի հյուսիսային կողմում, նրա ամբողջ երկարությամբ, կառուցվել է ջրահեռացման թունելախորշ, որով հավաքված ջրերը հոսում են եւ թափվում Գողթ գետակը: 1987 թ. ավարտվել է Կաթողիկեի ու գավթի տանիքների՝ բազալտե քարերով սալարկումը: Հիմնադրման օրից Գեղարդավանքի ուխտի օրերը Քրիստոսի պայծառակերպության (Վարդավառ) եւ Աստվածածնի վերափոխման տոներն են:

Գեղարդավանքը 2000 թվականից գրանցված է Միավորված ազգերի կազմակերպության կրթական, գիտական եւ մշակութային կազմակերպության՝ ՅՈՒՆԵՍԿՕ-ի (UNESCO) համաշխարհային ժառանգության ցանկում:

2018 թ. դեկտեմբերի 7-ին՝ ՅՈՒՆԵՍԿՕ-ի կենտրոնակայանում (Փարիզ) «Չինված ընդհարման դեպքում մշակութային արժեքների պաշտպանության մասին» ՅՈՒՆԵՍԿՕ-ի 1954 թ. կոնվենցիային կից 1999 թ. երկրորդ արձանագրության կոմիտեի 13-րդ նիստի ընթացքում, կոմիտեի անդամները միաձայն որոշում են կայացրել Հայաստանի ներկայացրած «Գեղարդի վանք եւ Ազատ գետի վերին հովիտ» (Monastery of Geghard and the Upper Azat Valley) վայրին, որպես մարդկության համար բացառիկ կարեւորություն ունեցող արժեք, ուժեղացված պաշտպանության կարգավիճակ (Enhanced protection) շնորհելու վերաբերյալ: Այն նպատակ է հետապնդում ապահովելու մարդկության համար առավել մեծ արժեք ներկայացնող հատուկ հուշարձանների լիարժեք եւ արդյունավետ պաշտպանությունը միջազգային կամ ոչ միջազգային զինված հակամարտությունների ժամանակ: «Ուժեղացված պաշտպանությունը» պահանջում է հակամարտող կողմերին ձեռնպահ մնալ մեծ հուշարձանի վրա հարձակումից, ինչպես նաեւ հուշարձանը կամ նրա անմիջական շրջապատը ռազմական նպատակներով ցանկացած օգտագործումից: Արձանագրությունը նաեւ սահմանում է քրեական պատիժներ՝ ֆիզիկական կամ անձանց կողմից մշակութային արժեքի նկատմամբ ուժեղացված պաշտպանությունը խախտելու պարագայում: «Ուժեղացված պաշտպանության» կարգավի-



ճակ ունեցող ՅՈՒՆԵՍԿՕ-ի համաշխարհային ժառանգության ցանկում այժմ ընդգրկված է մարդկության համար բացառիկ արժեք հանդիսացող մշակութային 17 կոթող:

Այսպիսով՝ «Գեղարդի վանք եւ Ազատ գետի վերին հովիտ» վայրը դարձել է Հայաստանի առաջին մշակութային արժեքը, որին «Ուժեղացված պաշտպանության» կարգավիճակ է շնորհվել:

* * *

Գեղարդավանքը Հայաստանի ամենահայտնի եւ ամենաշատ այցելու ունեցող տեսարժան վայրերից է: Վանական համալիրի դիրքը շատ բանաստեղծական է, տարածքի կլիման՝ առողջարար: Անցյալում Գեղարդավանքը Էջմիածնի միաբանության համար ամառանոցային վայր է եղել: Ինչպես վերը նշեցինք, իր ներկայիս անվանումը վանքն ստացել է ի պատիվ XIII դարում Ս. Էջմիածնից այստեղ բերված եւ մոտ 500 տարի պահված համաքրիստոնեական սրբություններից մեկի՝ աստվածամուկ սուրբ գեղարդի: Բարեպաշտ հավատացյալներն Այրիվանք ուխտի գնալիս ուղղակի ասում էին. «Գնում եմք ս. Գեղարդ՝ ուխտի», կամ՝ «Գնում եմք Գեղարդավանք՝ ուխտի»: Այսպես ժամանակի ընթացքում Այրիվանք անունն իր տեղը զիջեց Գեղարդավանքին: Գեղարդի պատվին անվանակոչվեց ոչ միայն վանքը, այլեւ Գեղամա լեռների մի ճյուղը, որը ձգվում է դեպի հարավ եւ կոչվում Գեղարդասար: Գեղարդասարի կիրճը, որն Ազատ գետի վերին հոսանքի շրջանն է, կոչվում է Գեղարդածոր: Իսկ ինչ է քրիստոնեական աշխարհի համար սրբություն դարձած այդ գեղարդը: Այն շուրջ 15 սմ երկարությամբ տափակ եռանիստ երկաթյա տեգ է, որը, փայտի ծայրին ամրացվելով, ծառայել է որպես խոցող գեղձ՝ միզակ: Հիսուսին խաչելուց հետո հռոմեացի զորականներից մեկը (ըստ ավանդության՝ հայրուրապետ Դուռնկիանոսը (Լոնգինոս)), հաստատ համոզվելու համար, որ խաչված Հիսուս Քրիստոսն արդեն մեռած է, Նրա կողք միզակով խոցեց մինչեւ սիրտը, «իսկույն արյուն եւ ջուր ելավ» (Հովհ. ԺԹ 33–34): Ավանդությունը պատմում է, որ Քրիստոսի վերջից կաթող ջրի ու արյան խառնուրդից ցայտել է Դուռնկիանոսի հիվանդ աչքերին եւ բուժել՝ վերականգնելով նրա տեսողությունը: Նա դարձել է քրիստոնյա, քարոզել Մերձավոր Արեւելքում՝ իր հետ ունենալով սուրբ գեղարդը: ➤ էջ 7

Զարեհ Որբունու պապամվածքները



Սկիզբը՝ թիվ 8–10, 12–16

2.

Որբունու բազմաթիվ պատմվածքներում («Գինով», «Մեմուսին» եւ այլն) սյուժեն զարգանում է ոչ թե գործողությունների հերթագայումով, այլ հերոսի խորհրդածություններով ու մտորումներով: Սյուժետային զարգացումը հիմնվում է գլխավոր կերպարի ապրումների եւ զգացումների վրա: Բնության շնչավորումն առավել ակնհայտորեն է ներկայացնում նրանց հոգեվիճակը: Գործողություններին մասնակից է դառնում ողջ իրականությունը, շնչավորվում են անշունչ առարկաներն ու իրողությունները՝ առավել

պատկերավոր ներկայացնելով հերոսի ապրումներն ու զգացումները:

Այսպիսով՝ Զարեհ Որբունու արձակն ունի իր առանձնահատկությունները: Սփյուռքահայ մշակույթի գրող Զարեհ Որբունին գրական մեծ գործունեություն է ծավալել: 20-ական թվականներից եռանդուն մասնակցություն է բերել ֆրանսահայ գրական-մշակութային կյանքին: Պետրոս Զարոյանի հետ կարճ ընթացքում հրատարակել է «Նոր հաւատք» հանդեսը, «Լուսաբաց» ամսաթերթը, աշխատակցել Սփյուռքի առաջադիմական մամուլին՝ հատկապես ֆրանսահայ հանդեսներին ու թերթերին: Որբունին գրել է վեպեր, պատմվածքներ:

Որբունու պատմվածքներն ունեն կառուցվածքային ու թեմատիկ առանձնահատկություններ: Ստեղծագործություններում պատկերվում են հասարակ մարդկանց, հայրենիքից հեռու գտնվող պանդուխտների կյանքի դժվարին օրերը: Հաճախ նրանց գործողությունների փոխաբեն ներկայացվում են հերոսների ապրումներն ու մտահոգությունները: Պատմվածքներում հիմնականում հանդես են գալիս դրական հերոսներ, որոնք փորձում են հաղթահարել կյանքի դժվարությունները, հայրենիքի կարոտը, նյութական զրկանքները եւ այլն: Այդ հերոսների կողքին հանդիպում են նաեւ այնպիսիք, որոնց համար մարդկային կյանքն արժեք չի ներկայացնում. նրանք մտահոգված են միայն իրենց նյութապաշտական մղումներով:

Զարեհ Որբունու պատմվածքները ոչ ծավալուն գործեր են: Նշված ստեղծագործություններում երբեմն գործողությունները կատարվում են անսպասելիորեն. սկիզբն ու վերջը չեն կանխորոշվում, կամ էլ անսկզբու-

թյուն ու անվերջություն է տիրում ստեղծագործության գործողություններում: Մանրի ու մեծի, կարեւորի ու անեականի զանազանում չկա. բոլոր իրողությունները քննվում են զննող հայացքի, միեւնույն լարված ուշադրության, հավասար լույսի տակ: Ստվերներն անկյուններում չեն խտանում, մարդիկ խոսում են այնպես, ինչպես կխոսեին փողոցում, ժողովի ժամանակ եւ այլուր:

Մի շարք պատմվածքներում սոցիալական կեցության խնդիրներին զուսմարվում են նաեւ սփյուռքահայի կյանքի դժվարությունները: Կեցության խնդրից բացի՝ աշխարհի տարբեր անկյուններում հայտնված հայերն ապրում էին հայրենիքի կարոտով, սրտատրոփ սպասում հայրենիքից եկող լուրերին, ապրում դրանցով, ուրախանում էին՝ իրենց հայրենակիցներին հանդիպելով:

Որբունու պատմվածքներում ընթերցողի առաջ հառնում է սփյուռքահայի տարագիր կյանքը: Հեղինակը, հեռու լինելով հայրենիքից, առավել խտացրած գույներով է պատկերել հայրենիքի նկատմամբ սերն ու կարոտը: Այդ բոլորի մեջ կա ազգային գիծը՝ հայկականը, որն զգալ է տալիս գրողի մտահոգությունն իր ժողովրդի ճակատագրի նկատմամբ:

Գրողի պատմվածքների հերոսներն արդարամիտ ու ազնիվ մարդիկ են: Չնայած կյանքի անարդարություններին ու դաժան օրերներին՝ նրանք ապրում են ազնիվ ու շիտակ կյանքով՝ հավատարիմ իրենց բարոյական սկզբունքներին: Կյանքի դժվարությունները չեն ստիպում նրանց փոխել կեցության ձևը: Հաճախ ներքուստ տառապում են, բայց նույնիսկ այդ պարագայում չեն դավաճանում իրենց մարդկային տեսակին: Պատմվածքներ-

րի սյուժետային առանցքը կազմում են գլխավոր հերոսների կյանքի տխուր պատկերները՝ երազանք, ձգտում, հոգեկան ապրում եւ հուսալքում: Մարդու ներքին ապրումների խոր ընդհանրացումներ են «Համուն առաջադանքին», «Մեմուսին», «Սեւ մազերը», «Գինուրը» եւ այլ պատմվածքներ: Որբունին պատմում է ջերմ շնչով, պատմում է ընդհանրապես առաջին դեմքով: Ընթերցողը հավատում է հեղինակին՝ հաճախ տվյալ պատմումը համարելով որպես գրողի կյանքի դրվագներից կազմված արտացոլում եւ ապրված էջ:

Գեղարվեստական գրականության նպատակն ընդհանրապես կյանքի պատկերավոր վերարտադրությամբ մարդկային գեղեցիկ իդեալների՝ բարու, արդարության, առաքինության, մարդասիրության, մարդու մեջ մարդկայինի հաստատումն է եւ մերժումն ամենայն չարի, որը խաթարում է մարդու մեջ մարդկայինը, բնականն ու գեղեցիկը: Այս ամենը սփյուռքահայ գրականությունը փորձել է տալ ամենից առաջ տարազի, անհայրենիք հայության կյանքի պատկերներով: Սփյուռքահայ գրականության գլխավոր թեման եղավ ու մնաց սփյուռքահայության ճակատագրի քննությունը, նրա անցած ու ներկա կյանքի պատմությունը հայրենի հողի վրա, հայրենի օջախում նրա եւ երջանիկ, եւ հոգսաշատ օրերից մինչեւ ջարդ ու աքսորի տաժանելի օրերը, թափառումները երկրենիք, մի կտոր հայրենիք որոնումներն օտար ափերում: Այդ գրականության համատեքստում Զարեհ Որբունու գրականությունն ինքնուրույն տեղ ունի:

Մերի ՀՈՎՀԱՆՆԻՍՅԱՆ
Բանասիրական գիտ. թեկնածու


«Միջազգային կրոնական ազատություն եւ խաղաղություն»



← էջ 2
Մեր՝ հոգևորականների առաքելությունը պետք է լինեն մեր հոգու բոլոր ուժերով աղոթելն Աստծուն եւ չտկարացող եռանդով գործելը՝ բարոյական ուժը առավել ու առավել հզորացնելու ուղղությամբ, որպեսզի ազգությունների ու պետությունների միջեւ ստեղծվեն խաղաղարար հարաբերություն-



ներ բոլոր տեսակի հարցերի լուծման ճանապարհի վրա»:
Միրելիներ, Աստծո օրհնությունը, կյանքի առաջընթացն ու երջանկությունը խաղաղության մեջ են: Խաղաղության մեջ է նաեւ հույսը գալիքի: Քրիստոնյաներիս համար խաղաղության կոչել եւ խաղաղություն հաստատել նշանակում են



վկայել Քրիստոսին: Մեր Տիրոջ ու Փրկչի պատգամն է՝ «Խաղաղություն արարեք ընդ միմեանս» (Մարկ. 9.49): Արդարեւ, առ Աստված մեր հավատի դրսևորումն են խաղաղությանն ուղղված մեր քայլերը, քանզի հավատն ինքը մարդու խաղաղության ուխտն է Աստծո հետ:



ատելության եւ անհամդուրժողականության դրսևորումների մարդկությունը բախվել է բազմիցս: Մեր ժողովուրդն իր պատմության ընթացքում եւս կրել է ազատության ոտնահարման եւ էթնիկ ատելության հետեւանքները: Մեր ժողովրդի կյանքում այդպիսի ողբերգական իրադարձություններ տեղի ունեցան 20-րդ դարասկզբին, երբ Օսմանյան կայսրությունում մեկ եւ կես միլիոն հայ զոհ դարձավ Ցեղասպանության, եւ հայ ժողովուրդը մեծագույն կորստի վիշտը կրեց՝ զրկվելով նաեւ իր պատմական հայրենիքից: Մարդկության պատմության առաջին ցեղասպանության հանդէպ անտարբերությունն ու իրավական միջոցների կիրառման հապաղումը բերեցին այլ ցեղասպանությունների եւ մարդկության դեմ հանցագործությունների, որոնց ցավալի հետեւանքներից էին անցյալ դարի կեսերին իրագործված հոլոքոստը, 20-րդ դարավերջում՝ Կամբոջայի, Ռուանդայի, Դարֆուրի ցեղասպանությունները եւ այլն:


Նման ցավալի իրադարձությունների բախվեցինք բոլորովին վերների բախվեցինք բնակվող մեր ժողովրդի նկատմամբ Ադրբեջանի կողմից լայնածավալ պատերազմ սանձազերծվեց: Ռազմական գործողությունների ընթացքում, որում ներգրավված էին թուրքական զինված ուժեր, միջազգային ահաբեկչական խմբավորումներ, խաղաղ բնակավայրերի եւ ժողովրդի դեմ գործածվեցին ֆոսֆորային եւ արգելված այլ զինատեսակներ: Այդ ողբերգական իրադարձությունների հետեւանքով զոհվեցին ու հաշմանդամ դարձան հազարավոր անձեր, ավերվեցին բնակավայրեր, տասնյակ հազարավոր ընտանիքներ դարձան գաղթականներ, ինչպէս զինվորականների, այնպէս էլ խաղաղ բնակչության շրջանից, անգամ ռազմական գործողություններից հետո գերեզմարկներ եւ մինչ այսօր Ադրբեջանում պահվում են դաժան պայմաններում՝ միջազգային մարդասիրական իրավունքի կոպիտ խախտումներով: Հայ ռազմագերիների ազատ արձակման եւ կրոնամշակութային արժեքների պահպանության ուղղությամբ կատարած աշխատանքի համար ցանկանում ենք եւս մեկ անգամ Մեր գնահատանքը եւ շնորհակալությունը հայտնել միջազգային մարդասիրական ու միջեկեղեցական բոլոր կազմակերպություններին եւ այստեղ ներկա ձեզ ամենքիդ:

Պատերազմի օրերին սրբավայրերի ռմբակոծությունը եւ ավերումը, որոնց դրսևորումները եղան նաեւ պատերազմից հետո, վկայում են Արցախից հայկական հետքը ջնջելու Ադրբեջանի քաղաքականության մասին, ինչպէս որ 2003 թ. հիմնապէս ոչնչացվեց Ջուղայի հայկական գերեզմանոցի ավելի քան վեց հազար խաչքար, եւ տարածքը վերածվեց հրաձգարանի: Դեռեւս թարմ են հիշողությունները, թե պատերազմական գործողությունների հետեւանքով վերջին տասնամյակներից ինչպիսի մշակութային կոթողների ավերածություններ տեղի ունեցան Աֆղանստանում, Իրաքում, Սիրիայում, Եգիպտոսում: Այս առումով խիստ անհրաժեշտ են միջազգային համրության եւ համապատասխան կազմակերպությունների միահամուռ ջանքերը՝ կանխելու մշակութային եղեռնը, ապահովելու կրոնական եւ մշակութային հուշարձանների պահպանությունը: Հրամայական է Ադրբեջանի վերահսկողության տակ անցած տարածքներում ՅՈՒՆԵՍԿՕ-ի փորձագիտական առաքելության կողմից հայ-

կական մշակութային ժառանգության վիճակի գնահատումը, որին ամեն կերպ խոչընդոտում է Ադրբեջանը: Ի հավելումն նշենք, որ Մոսկվայի եւ Համայն Ռուսիո Ամենապատիվ Կիրիլ Պատրիարքի, Ռուսաստանի Դաշնության նախագահ տիար Վլադիմիր Պուտինի, ռուսական խաղաղապահ ուժերի ջանքերով հնարավոր եղավ ապահովել Դաղվանքի պատմական մեր հնագույն սրբավայրի կենսագործունեությունը, որտեղ այսօր վեց վանական իր հոգեւոր ծառայությունն է իրականացնում:



Միրելիներ, հայ ժողովուրդը եւ Հայոց Եկեղեցին դարեր ի վեր պատմական հանգամանքների բերումով եւ հատկապէս Հայոց ցեղասպանության հետեւանքով ապրել եւ շարունակում են ապրել աշխարհի գրեթե բոլոր աշխարհամասերում, ամենատարբեր կրոնամշակութային միջավայրերում՝ խաղաղ համակեցությամբ բնակվելով իսլամական, բուդդիստական, հինդուիստական, հուդայական, քրիստոնեական հա-



րանվանությունների հետ՝ լավագույն վկայությունը բերելով աշխարհում կրոնների երկխոսության եւ խաղաղ համակեցության: Կրոնի ազատությունն այսօր էլ գերակա սկզբունք է: Այն ամրագրված եւ երաշխավորված է միջազգային հիմնարար հռչակագրերով, պայմանագրերով, ժողովրդավարական երկրների սահմանադրություններով եւ օրենքներով: Կրոնական ազատության գաղափարը, սակայն, հաճախ իրագործվում է խղճի ու դավանանքի համամարդկային արժեքների ներքո քողարկվող կրոնական ազատության չարաշահումով: Այնուհայտ է, որ դավանանքի ազատության իրավունքի շղարշի տակ ներկայում ձեւավորվում եւ գործունեություն են ծավալում կրոնական մոռոթյա տոտալիտար աղանդներ, որոնք, խեղելով մարդկանց հոգեւոր եւ հոգեկան վիճակը, քայքայիչ գործունեությամբ պառակտում են մտքն ու ընտանիքներում, հասարակության կյանքում, թշնամանք սերմանում ավանդական կրոնական կառույցների նկատմամբ: Այս առումով եւս պետք է ամեն ջանք ներդնել, որ կրոնական ազատության գաղափարները չարիքի պատրվակ չդառնան, այլ ծառայեն մարդկանց, հասարակությունների եւ ժողովուրդների բարօրությանն ու լուսավոր գալիքին, ամրապնդեն արդեն կես դարից ավելի զարգացող միջեկեղեցական եղբայրության ու համագործակցության ոգին, ծառայեն համընդհանուր քրիստոնեական վկայությանն աշխարհում:

Համաժողովի հարգարժան մասնակիցներ, առ Աստված աղոթքով վերստին Մեր օրհնությունն ենք բերում ամենքիդ եւ ողջունում ձեր ներկայությունը Մայր Աթոռ Ս. Էջմիածնում: Մաղթում ենք, որ աշխարհի տարբեր երկրներից ժամանած կրոնական առաջնորդների, եկեղեցականների, առաջատար գիտնականների ու փորձագետների կողմից ներկայացվող զեկույցները եւ արգասավոր քննարկումները բարի նպաստ լինեն աշխարհում ազատության եւ խաղաղության ամրապնդմանը: Սուրբ Հոգու առաջնորդությունն ենք հայցում ձեզ եւ արդյունավոր ընթացք համաժողովի աշխատանքներից»,- ասաց Վեհափառ Հայրապետը:

Մասնակիցներին իրենց ողջույնի խոսքը հղեցին նաեւ Եկեղեցիների համաշխարհային խորհրդի գլխավոր քարտուղար հայր Իոան Սաուկան, Եվրոպական Եկեղեցիների

Խորագրով երկօրյա միջազգային համաժողովը Մայր Աթոռում

համաժողովի նախագահ հայր Քրիստիան Քրիզերը, ԱՄՆ-ի Եկեղեցիների ազգային խորհրդի գլխավոր քարտուղար եւ նախագահ պրն Ջիմ Ուինքլերը, Ղպտի Ուղղափառ Եկեղեցու՝ Լոնդոնի թեմի առաջնորդ արք. Անգելոսը, Ասորի Ուղղափառ Եկեղեցու՝ Բելգիայի, Ֆրանսիայի եւ Լյուքսեմբուրգի պատրիարքական փոխանորդ Ջորջ արք. Կուրիեն, Անգլիկան Եկեղեցու՝ Ջիբրալթարի եպս Ռոբերտ Իմենսը, Հնդկաստանի Մալանկարա Ուղղափառ Եկեղեցու Էկոմենիկ հարաբերությունների բաժնի քարտուղար հայր Աբրահամ Թոմասը, ՀՀ-ում Վատիկանի պապական նվիրակ արք. Խոսե Բետանկուրը, որը փոխանցեց Հռոմի Սրբազան Քահանայապետ Նորին Սրբություն Ֆրանցիսկոս Պապի ուղերձը, Ռուս Ուղղափառ Եկեղեցու՝ Մոսկվայի Պատրիարքության արտաքին հարաբերությունների բաժնի փոխանորդ հայր Ֆիլարետ Բուլեկովը, որը փոխանցեց նույն բաժնի տնօրեն Իլարիոն միտրոպոլիտի ուղերձը, Հայաստանում Արեւելքի Ասորի Եկեղեցու սպասավոր հայր Նիկողեմոս Յուլիանանը՝ փոխանցելով Արեւելքի Ասորի Եկեղեցու Նորին Սրբություն Գիվարգիզ Գ Սլիվա Կաթողիկոս-Պատրիարքի ուղերձը:

Այնուհետեւ բանախոսեց Հայաստանի մարդու իրավունքների պաշտպան պրն Արման Թաթյանը: Վերջինս, իր խոսքում անդրադառնալով կրոնի, խղճի եւ մտքի ազատության արդի հիմնահարցերին, նաեւ ձեռք բերված փաստերի հիման վրա արձանագրեց, որ պարբերաբար ուղեւորվում են արցախյան վերջին պատերազմի հետեւանքով աղբյուրազանցված գերության մեջ հայտնված հայ ռազմագերիների իրավունքներն ու կրոնական զգացումները, ինչպես նաեւ շարունակաբար ունեցվող իրականացվում Ադրբեջանի վերահսկողության տակ անցած հայկական հոգեւոր եւ մշակութային ժառանգության նկատմամբ: Մարդու իրավունքների պաշտպան Ադրբեջանի որդեգրած նման վարքագիծը որակեց իբրեւ ցեղասպան քաղաքականություն:

Պրն Թաթյանը նաեւ մեծապես կարեւորեց Հայ Եկեղեցու եւ քրիստոնեական միջազգային կառույցների դերակատարությունը ինչպես մարդու իրավունքների պաշտպանության,

ր ա ն ու մ Հ Հ ն եր կ ա յ ա ց ու ճ ի չ եղիշե Կիրակոսյանը («Հայկական մշակութային եւ պատմական ժառանգության պաշտպանությունը՝ ըստ Մարդու իրավունքների Եվրոպական կոմիտեի»)», Քրիստոնեական միջազգային համերաշխության նախագահ Ջոն Էյքները («Կրոնական զտույն ընթացքի մեջ. Հայոց ցեղասպանությունը ժամանակից եւ տարածությունից վեր»), մարդու իրավունքների ոլորտի աշխատակից Շեյլա Փալյանը («Մշակութային ժառանգության եւ մշակութային ցեղասպանության կանխարգելումը միջազգային օրենքի պաշտպանության պատասխանատվության ներքո»), Կալիֆոռնիայի համալսարանի գեղարվեստի եւ արվեստի պատմության պրոֆեսոր Հեղմար Ուոթենսոնը («Մշակութային եւ կրոնական ժառանգություն եւ մարդու իրավունքներ»), եւ Բարնաբասի միջազգային հիմնադրամի տնօրեն քրեպիսկոպոս Պատրիկ Սուրբոնը («Կրոնական ծայրահեղականություն. ազդեցությունը աշխարհում»):

Ձեկուցումներից հետո տեղի ունեցան ըննարկումներ:

Միջազգային համաժողովի առաջին օրվա ավարտին Ամենայն Հայոց Կաթողիկոսը հյուրընկալեց Եկեղեցական կառույցների ղեկավարներին եւ Եկեղեցիների հոգեւորական ներկայացուցիչներին:

Սեպտեմբերի 10-ի առավոտյան Մայր Աթոռ Ս. Էջմիածնի Սուրբ Հովհաննես Մկրտիչ եւ Սուրբ Վարդան մատուռ-մկրտարանում Ամենայն Հայոց Կաթողիկոսի համոխսապետությամբ կատարվեց Արեւագալի ժամերգություն, որին մասնակցեցին նաեւ միջազգային համաժողովի մասնակիցները:

Էկոմենիկ աղոթքից հետո համաժողովը շարունակեց իր աշխատանքը: Ժողովականներին իրենց ուղերձները հղեցին Մայր Աթոռի՝ Արցախի հոգեւոր-մշակութային ժառանգության պահպանության հարցերով զրասենյակի տնօրեն Գարեգին վրդ. Համբարձումյանը, Արցախի թեմի առաջնորդ Վրթանես եպս Աբրահամյանը, Արցախի արտաքին գործերի նախարար Դավիթ Բաբայանը եւ Արցախի կրթության, գիտության, մշակույթի եւ սպորտի նախարար Լուսինե Կարախանյանը:

Ուղերձներում մասնավորապես ընդգծվեց վերջին պատերազմից հետո Ադրբեջանի վերահսկողության տակ անցած տարածքներում հայկական հոգեւոր եւ պատմամշակութային ժառանգության դեմ իրականացվող ունեցվող իրավունքների կանխարգելման անհրաժեշտությունը, ինչպես նաեւ կարեւորվեց միջկրոնական երկխոսությունը՝ որպես հակամարտությունների խաղաղ կարգավորման, ազգային խտրականության եւ անհամադրվողականության դեմ պայքարի ամենաարդյունավետ միջոցներից մեկը: Այս գործընթացում բարձր գնահատվեց Հայ Առաքելական Ս. Եկեղեցու եւ քրիստոնեական տարբեր կառույցների դերը:

Այնուհետեւ զեկույցներ ներկայացրեցին Եվրոպական Եկեղեցիների համաժողովի նախագահ հայր Վերապատվելի Քրիստիան Քրիզերը («Կրոնական հուշարձանների եւ սրբավայրերի անվտանգությունն ու պահպանությունը Եվրոպայում»), ԱՄՆ-ի Կոլորադոյի համալսարանի միջազգային հարաբերությունների բաժնի դասախոս Սիմոն Մադաքյանը («Կրոնական ազատության միջոցով կանխել Արցախի մշակութային ցեղասպանությունը»), ԵՊՀ-ի դասախոս Համլետ Պետրոսյանը («Մշակութային ժառանգությունը հարձակումների թիրախ: Արցախի Տիգրանակերտը»), Արցախի մարդու իրավունքների պաշտպան Գեղամ Ստեփանյանը («Ադրբեջանական վանդալիզմի դրսեւորումներն Արցախի հոգեւոր-մշակութային ժառանգության, կրոնական իրավունքների եւ Արցախի ժողովրդի ազատության դեմ»), գրող, մշակութային ակտիվիստ եւ ձեռնարկատեր Թոմաս Հաջիթոֆին («Կրոնական ժառանգությունը՝ որպես միջոց խաղաղություն ու համերաշխություն խրախուսելու գործում»), «Բեթ Մարդոթ» եւ «Գորգիաս» լրատվական կայքերի գլխավոր խմբագիր Ջորջ Քիրազը («Հայաստանական մշակութային փոխառություններ. ինչպես պահպանել պատմական ժառանգության ինքնատիպությունը»), Թաֆթի համալսարանի արվեստի, պատմության բաժնի պրոֆեսոր Քրիստինա Մարանցին («Կարսի, Անիի հայկական հուշարձանները. դասեր Արցախի համար»), ԱՄՆ-ի Լաֆայետի քոլեջի պատմության պրոֆեսոր Ռեյչլ Գոշգարյանը («Արվեստի թուրքիայում ոչնչացված հուշարձանների եւ



գերեզմանատների առկայության պայմաններում») եւ Ջալգրուգի համալսարանի քրիստոնեական Արեւելքի ուսումնասիրությունների կենտրոնի տնօրեն ժասմին Դում-Թրագուրը («Փոքրամասնությունների մշակութային եւ պատմական ժառանգության պահպանումը»):



Ձեկույցների ավարտից հետո համաժողովն ամփոփեց իր աշխատանքը:

Սեպտեմբերի 11-ին ժողովականներն այցելեցին Ծիծեռնակաբերդի հուշահամալիր, Հայոց ցեղասպանության բան-



այնպես էլ հոգեւոր-մշակութային արժեքների պահպանության գործում:

Ապա զեկույցներով հանդես եկան Եկեղեցիների համաշխարհային խորհրդի գործող գլխավոր քարտուղար հայր Իոան Սաուկան («Կրոնական եւ մշակութային ժառանգության պաշտպանության միջոցով աջակցել խաղաղությանն ու կրոնական ազատությանը»), ԱՄՆ-ի Եկեղեցիների ազ-




գային խորհրդի գլխավոր քարտուղար եւ նախագահ Ջիմ Ուինքլերը («Համագործակցության անհրաժեշտությունը կրոնական ազատությունն ու հավատը պաշտպանելու գործում»), Մեծ Բրիտանիայի Լորդերի պալատի անդամ եւ նախկին փոխխոսնակ բարոնուհի Քերոլայն Քոքսը («Ցավը եւ տառապանքը տարանջատելու առավելությունը»), Ղպտի Ուղղափառ Եկեղեցու՝ Լոնդոնի թեմի առաջնորդ Անգելոս արքեպիսկոպոսը («Համագործակցության անհրաժեշտությունը կրոնական ազատությունն ու հավատը պաշտպանելու գործում»), Մարդու իրավունքների եվրոպական դատա-



գարան, Սուրբ Մեսրոպ Մաշտոցի անվան Մատենադարան եւ Մայր Աթոռ Ս. Էջմիածնի թանգարաններ:

Լրատվական նյութերը՝ Մայր Աթոռ Սուրբ Էջմիածնի տեղեկատվական համակարգի



Վաթսուռականների արձակագիրներ. Ժամանակը եւ հերոսը



Սկիզբը՝ թիվ 12—16

Դեպի ընդհանրացում տանող, համադրությունների ու թափանցումների մղող վիպասանության տարատեսակ համարվեց փիլիսոփայականը. «...մեր արձակը պետք է թեւակոխի ավելի բարձր փուլ՝ հասնի իրականության փիլիսոփայական յուրացման» («Վոպրոսի լիտերատուրի», 1975, թիվ 10, էջ 38):

Փիլիսոփայական էին դիտվում Յուրի Բոնդարենի «Տաք ձյուն» եւ «Եզերք» վեպերը: Վերջինում կա պատերազմ, որ ուղղորդում է դիպաշարը, կա նաեւ ժամանակակից կյանք, կան մտավորականության մտահոգություններ, սեր, գաղափարական բախումներ: Այդ իսկ պատճառով «Եզերք»-ը բնորոշվում է նաեւ որպէս «փիլիսոփայական-քաղաքական վեպ» (Վ. Սոկոլով, «Վոպրոսի լիտերատուրի», 1975, թիվ 9, էջ 52): Փիլիսոփայական է համարվում նաեւ Անդրեյ Բիտովի վիպասանություն-

նը («Անիվ», «Զինվորը», «Ինչ եղել է, այն էլ կա...», «Հայաստանի դասերը», ավելի ուշ՝ «Պուշկինյան տուն»-ը): Բայց, ահա, Գրիգորի Բակլանովը համդես եկավ եւ հայտարարեց. «Ես, օրինակ, վստահ չեմ, թե փիլիսոփայական վեպը գրականության բարձրագույն աստիճանն է» («Վոպրոսի լիտերատուրի», 1975, թիվ 8, էջ 65):

Այսպէս միտումները հասունանում, զուգահեռվում կամ բախվում են, ինչը գրականու-

թյան կենդանի զարգացման նախապայման է:

Ինչպէս միութենական, այնպէս էլ հայ արձակն արդիական նյութի գեղարվեստական մարմնավորման առումով կանգնած է հոգեպէս հարուստ ու տարողունակ հերոսի հայտնաբերման ու կերպավորման ճանապարհին: Այդ հերոսի բնավորության, նկարագրի, պահվածքի առանձին գծեր արդեն հայտնաբերվել են, մնում է գտնել այդ ամենն իր մեջ խտացնող մեր ժամանակի գլխավոր հերոսին, որը վերածվի գեղարվեստական տիպի:

Այնպէս որ, թե՛ հաջողություններով, թե՛ պակասություններով արդի հայ արձակը համամիութենական արձակի օրգանական մի մասն է: Տարբեր են ավանդույթները, տարբեր է միջավայրը, բայց նույն են հիմնական դրամները, նույնն է գաղափարական ուղղվածությունը: Սրանք արդեն բավարար հիմք են նույն պահանջների համար:

Հրանտ Մաթեոսյանն իրական թանձր գույներով ստեղծում է հետպատերազմյան տարիներից 1960—1970-ականներն ընդգրկող հայկական գյուղի առկա պատկերը: Գյուղն իր ներքին կյանքով, մեծ աշխարհի հետ տարատեսակ կապերով դառնում է կենսական կարեւոր հարցերի բացահայտման հիմնական նախադրյալ:

Մաթեոսյանի բոլոր գործերն օրգանապէս կապակցված են. դրանք, կարծես, մի մեծ ու բազմաշերտ վեպի առանձին գլուխներ լինեն: Նա տարբեր վերնագրերով, միեւնույն ստեղծագործական ուղղվածությամբ, վերարտադրում է միեւնույն շրջապատի մարդկանց կյանքի պատմությունը: Կայուն ու անփոփոխ են թե՛ նրա ստեղծագործության աշխարհագրական միջավայրը, թե՛ կենսական վիճակներն ու հարաբերությունները, որոնք դառնում են ներշնչանքի աղբյուր, եւ թե՛ հերոսները, որոնք միեւնույն նկարագրով եւ կյանքի հանդէպ նույն դիրքորոշումով հանդես են գալիս տարբեր գործերում:

Կյանքի ինչպիսի՞ պատկերներ եւ ի՞նչ կերպարներ է ստեղծում Մաթեոսյանը, ի՞նչ հիմնական սկզբունքներ են ընկած նրա խոսքի հիմքում: Փորձենք այս հարցերի պատասխանը որոնել նրա հիմնական գործերի քննությամբ, որոնք են՝ «Օգոստոս» ժողովածուն (1967) եւ մամուլում տպագրված մի շարք վիպակներ ու պատմվածքներ՝ «Գոմեշը» (ՍԳ, 1968, թիվ 8), «Խում-հար» (ՍԳ, 1970, թիվ 3), «Երկրի ջիղը» (ՍԳ, 1972, թիվ 1), «Սկիզբը» («Գարուն», 1974, թիվ 4), «Ծառերը» («Գարուն», 1975, թիվ 7): Մաթեոսյանի նշված գործերը, մեկը մյուսին լրացնելով ու ամբողջացնելով, ստեղծում են միեւնույն շրջապատի ու միեւնույն մարդկանց կենսական ու տեսանելի կերպարներ: Մեր ժամանակների մակերե-

սային, խաբուսիկ, օրվա հետ մոռացվող պատկերներն ու հոգեվիճակներն ամենեւին էլ չեն զայթակղում գրողին. նա փորձում է բացահայտել մարդկային կյանքն իմաստավորող այնպիսի հարցեր, որոնք նրա պատկերած նյութն արժեքավորում են ժամանակակից կյանքի ու մտածողության մակարդակով եւ ի հայտ բերում հոգեբանական, բարոյական, գոյափիլիսոփայական այնպիսի հարուստ ու խոր շերտեր, որոնք (անկախ նրանից՝ մարդը քաղաքաբնակ է, թե՛ գյուղաբնակ, մտավորական է, թե՛ հողի աշխատավոր) հոգեհարազատության հիմք են ստեղծում նրա հերոսների կյանքի ու այդ կյանքին ծանոթացողների միջոց: Մաթեոսյանի հերոսները, մնալով հանդերձ իրենց ծագման կրողները, յուրովի իմաստավորում են այդ կյանքը եւ նոր կողմերից ներկայացնում, բացահայտում այդ կյանքի էությունը: Սա է առաջին հերթին գրողի տաղանդի ուժը, քանի որ նա կարողանում է իր օգտագործած կենսական նյութը գեղարվեստական փաստ դարձնել աշխարհայացքային այնպիսի նպատակաուղղվածությամբ, որ գալիս խառնվում է ժամանակակից կյանքի գլխավոր իրադարձություններին: Իսկ նրա օգտագործած կենսական նյութն իրեն լավ ծանոթ գյուղական կյանքն է, որ իր մեջ տարբեր ձեւերով բեկում է այսօրվա կյանքի հիմնական բովանդակությունը: Մնալով մեր ժամանակների հետ արտաքուստ ցցուն կապեր չունեցող նյութի շրջանակներում՝ նա հմուտ ներքնատեսությամբ կարողանում է շերտ առ շերտ բացահայտել կյանքից աստիճանաբար դուրս մղվող գյուղաշխարհի կարծր ու հին արմատները, որոնք սնունդ են առնում այսօրվա կյանքից եւ դառնում ժամանակակից իրականության օրգանական մասը:

➔ էջ 8

ԱԿՍԵԼ ԲԱԿՈՒՆՑԻ ՈԳԵՂԵՆ ՕՋԱԽՈՒՄ

Սկիզբը՝ թիվ 16

Վարդան Սարգսյանն է ինձ առաջնորդում թանգարան: Նրանից տեղեկանում եմ, որ մշակութային այս օջախը 1970-ին բացվել է կայացել է տեղական իշխանությունների ջերմագին հոգածության շնորհիվ, իսկ 1976-ից՝ դարձել էրեւանի Ե. Չարենցի անվան արվեստի եւ գրականության թանգարանի մասնաճյուղը: Հետագայում, գրողի ծննդյան բարեառիք հոբելյանների՝ 90 եւ 105-ամյակների կապակցությամբ, այն հիմնովին նորոգվել ու բարեկարգվել է՝ վերափոխվելով հուշահամալիրի: Գովելի է եւ սրտացավ այս վերաբերմունքը. ամխաթար պահպանվել են տան բնօրինակ ճակատը եւ ընդհանրապէս նրա ճարտարապետական կերպը. այն գրեթէ այնպէս է, ինչպէս Բակունցի բնակության ժամանակ էր: Բակունցների տունը գրավիչ ու ակնահաճո է նաեւ իր պարզութամբ, ինչն այցելուներին հնարավորություն է ընձեռում լավագույնս պատկերացնելու զանգեգրության հայկական օջախի կենդանի կյանքն ու կենցաղը:

Տնօրենը գործիմացորեն, սիրով ու արժանի հպարտությամբ է ներկայացնում թանգարանը: Անցնում ենք բոլոր՝ չորս սրահներով, ծանոթանում հարուստ ու բազմաբովանդակ ցուցանմուշներին: Դրանք տան հնաոճ կահույքը, գրողի անձնական իրերն են, գրքերը, տետրերը ու փաստաթղթերը, ժամանակի պարբերական մամուլում հրապարակված նյութերը՝ գրական եւ մասնագիտական (ճիշտն ասած, թող ինձ ներվի, հոգուս խորքում ափսոսանք եմ զգում, որ մեր արձակի անզուգական Վարպետը, մասնագիտության եւ աշխատանքի բերումով, թանկագին ժամանակ է վատնել գյուղատնտեսական թեմաներով բազմաբանակ հողվածների, ուղեցույցների ու գրքուկների վրա...):

Գրողի մեջարանում նրա մահճակալն է, հագուստը, աշխատասեղանն ու աթոռը,

մայրիկի գործած գունագեղ գորգերից: Հարեւանությամբ նաեւ փոքրիկ խոհանոց կա, եւ թոմիր, որտեղ հոգատար, ամիսնոջ Բաղչազյուլ մայրիկը լավաշ է թխել, հետո՝ համով բաղարջ ու զաթա...

Հաջորդ սրահի պատին «Ակսել Բակունցի մոր դիմանկարը» յուղաներկ աշխատանքն է, որի հեղինակը մեծն Մարտիրոս Սարյանն է: Կտավից՝ Վարպետի հավերժացրած անթարթ հայացքով նայում է Բաղչազյուլ մայրիկը: Այստեղ անհրաժեշտ փոքրիկ նախապատմություն կա:


1935-ի առաջին նկարիչ ընկերների հետ Գորիս է գալիս Մ. Սարյանը եւ իր պարտքն է համարում անպայման այցելել Ակսել Բակունցին:

«Ակսելի հրձկանքին չափ ու սահման չկար»,— գրում է Վահան Բակունցը: Նրանք երկարատեւ ուրախ գրուցում են:

«Այստեղ ինչ-որ կարոտ էր առաջացել գույների ու խոսքի մեծ Վարպետների միջեւ»,— դիպուկ նկատում է Վ. Բակունցը:

Եվ Վահան Բակունցը, եւ Մարիամ Ասլամազյանը ակնատես են եղել նկարի կերտմանը: Իրենց հուշագրություններում նրանք հաճույքով են պատմում այդ եղելությունը: Վ. Բակունցն իր «Մեծ հույզերի սերմնացանը» գրքում հիշում է, որ Մ. Սարյանը Գորիս էր եկել նկարելու «ինքնատիպ ու գեղեցիկ բնությունը»: Գորիսով հիացած Վարպետին արդեն հասկանալի է դառնում, «...թե որտեղից են Ակսելի սքանչելի սյուժեները... Այդ բոլորը Գորիսի անմահ բնությունն է նվիրել նրան»:

Մարիամ Ասլամազյանն էլ «Կյանքիս դավթար»-ում հիշատակում է. «Ակսելը Մարիամին հրավիրեց իր տանն ապրելու եւ ստեղծագործելու: Այս ընթացում Մարտիրոս Սերգեյիչը նկարեց Ա. Բակունցի մայրիկի դիմանկարը եւ նվիրեց նրան»: Ակսելը երեխայի պէս ուրախացել էր նկարի համար: Նա հիացմունքով մորը ասում էր. «Դու գիտե՞ս, թե ով է նկարել քո դիմանկարը: Մենք



Գործ՝ Մ. Ասլամազյանի

բոլորս էլ կհեռանանք այս աշխարհից, իսկ այս նկարը կմնա հավերժ»:

Այստեղ արժե մեջբերել նաեւ Վահան Բակունցի հիշատակած այն դրվագը, թե ամոթխած մայրն ինչքան է նեղվել բնորդի իր դերից: Նա հետո գանգատվել է, որ իրեն անշարժ «մին ժամից ավել էր մարդը մտադրել ա չոր աթոռին, թա պատկերդ քաշում եմ: Հոգիս տյուս եկավ, համութից քիչ էր մնում տափը ճղվեր մեջը մտնեմ: Բա կնիկարմատը էդքան վախտ խախի տղամարդու երեսին կլեշի»:

Երախտագետ Մարիամ Ասլամազյանն էլ է բարի հիշատակ թողել տուն-թանգարանին, ասել է թե՛ Բակունցների հյուրընկալ օջախին:

Նկարչուհին, ի սեր անմոռաց ընկերոջ՝ Ակսելի, հետագայում պատկերել է նրան սիրելի մայրիկի հետ՝ Գորիսի երկնամուխ, արեառ ժայռերի ֆոնին: Հիմա թանգարա-

նին մի առանձնակի շուք ու հմայք է տալիս այս բազմախոսուն հոյակապ յուղաներկ կտավը:

Կանգ ենք առնում ցուցանակի պատին փակցված մի հնօրյա փաստաթղթի առջեւ, եւ ուշադիր ընթերցում են:

Դարձյալ փոքրիկ ծանոթագրություն. Ակսել Բակունցի կենսագրության հայտնի փաստ է, որ 1910 թ. մայիսին նա բարձր առաջադիմությամբ ավարտում է Գորիսի հնգամյա ծխական դպրոցը: Ծակատագրորեն բախտորոշ է լինում Մայր Աթոռ Ս. Էջմիածնի Գեղորգյան ճեմարանի առաջադեմ սան, ազգակից Երեմիա Բակունցի խորհուրդը Ալեքսանդրին՝ ուսումը շարունակելու հեղինակավոր նույն կրթօջախում՝ ճեմարանում: Գործը հաջող ընթացք է ունենում. մի մեծ խումբ համախոհ, մտավոր գորիսցիներ «ԽՈՆԱՐԴ ԽՆԴԻՐ»-ով է «որդիական վստահությամբ» դիմում են հղում Ամենայն Հայոց կաթողիկոս Ս. Տ. Մաթեոս Բ-ին՝ նրա «...հայրական խնամքը վայելող ճեմարանի գիշերօթիկ սաների շարքում ընդունելու տեղույս ծխական դպրոցը ամենագույնի ու առանձնահատուկ ընդունակությամբ ավարտած Ալեքսանդր Ստեփանի Թեոսյան Բակունցին»: «Առ որ մնամք Ձերդ Սրբազան Օծության Սրբազնագույն աջը համբուրող ամենախոնարհ որդիք: 1910 թ. 10-ն օգոստոսի, քաղ. Գորիս»։— Խնդրագրի վերջում հերթով ստորագրել են 152 մարդ: Այսպիսով՝ բարի կամքի տեր արժանապատիվ այդ մարդիկ մի տաղանդավոր, օժտված պատանու առջեւ բացեցին լույսի ու լուսավորության նախադուռը՝ ժամանակի հետ գիտության դժվարավերելք, բարձրագույն աստիճաններով ելնելու... հայ արձակի գագաթը...

Դրսում արեւոտ պատին հենած ցանցավանդակներում, զանազան թռչուններ են պահվում: Դրանցից ամենաշքեղը, իհարկե, փափամն է՝ միրիափը՝ իբրեւ կենդանի խորհրդանիշ Ակսել Բակունցի անմահ «Միրիափի»:

➔ էջ 8

ՀԱՅ ԻՄԿԱՆՈՒԹՅԱՆ ՈՒ ԱՐՎԵՍՏԻ ՀԱՐՅՈՒՐԱՄՅԱՆ ՄԼՍՈՒՆԲԱՐԱՆԸ

Սկիզբը՝ թիվ 11–15

Ունեցվածային ձեռնարկումներ կազմակերպելիս թանգարանը չի մոռանում նաեւ ավագ սերնդին. տեղին է հիշել ծերերի տուն-ինտերնատների համար կազմակերպված «Մեկ օր թանգարանում» ակցիան:

Մեր մեծաց մասունքների մեկդարյա ամփոփարանն ուշադրության կենտրոնում է պահում նաեւ մատաղ սերնդի, երիտասարդության մշակութային կրթության խնդիրը, Հայաստանի վաղվա քաղաքացիների մեջ սեփական մշակույթի նկատմամբ սեր, պաշտամունք սերմանելը, նրանց իրենց մշակույթի կրողը դարձնելը, նրանց մեջ մշակութային արժեքը չարժեքից զանազանելու կարողություն ձեւակորելը, ասել է թե՛ մեր ազգի, մեր հասարակության, մեր պատմության, մշակութային անվտանգության խնդիրը, եւ իբրեւ սրա դրսևորում՝ պարբերաբար կազմակերպել ու կազմակերպում է կրթական ծրագրեր. վերջիններից են՝ «Կինոգետ», «Անկախ Հայաստան», «Աշունն իմ ձեռքերով», «Թղթե հեքիաթ», «Իմ կատակ թերթը», «Հողի ուժը», «Ես բեմանկարիչ եմ», «Ազգային նվագարանների աշխարհում», «Գորգի կախարդական աշխարհը», «Կարասկե թանգարանում. Կոմիտասի երգերի օրինակով», «Սովետների թատրոն թանգարանում», «Ինչպես են ստեղծվում մուլտֆիլմերը», «Բացահայտում»՝ եռամսա խաղ-էքսկուրսիա: Նշենք նաեւ Հայաստանի եւ Արցախի զորամասերում, բուհերում, կրթական այլ հաստատություններում կազմակերպված շրջիկ ցուցադրություններն ու դասախոսությունները:

Ինչպես վերն արդեն ասացինք, առանձնացված է նաեւ թանգարանի ունեցած գրականությունը. հորելյար հաստատության կազմում գործում է գրադարան: Վերջինիս տպագիր ֆոնդերը տեղաբաշխված են 3 տարբեր բաժիններում՝ ընդհանուր, ֆոնդային եւ մամուլի: Ընդհանուր բաժնում պահպանվում են հայերեն եւ այլ լեզուներով աշխարհի հատկապես հայաշատ վայրերից ստացված շուրջ 100 000 հայերեն ու օտարալեզու գրականություն եւ պարբերական մամուլ՝ գեղարվեստական ու գիտական:

Գրադարանն արժեւորվում է հատկապես ֆոնդային՝ հայ գրողների, հայագետների անձնական գրադարանների առկայությամբ. մոտ 25 000 գիրք: Մեծ արժեք ունեն դասական գրողներ Մ. Նալբանդյանի, Ռ. Պատկանյանի, Գ. Սունդուկյանի, Հ. Թումանյանի, Գ. Զոհրապի, Դ. Վարուժանի, Սիամանթոյի, Ե. Չարենցի, Դ. Դեմիրճյանի, հայագետներ

Մ. Աբեղյանի, Հ. Աճառյանի եւ այլոց գրքային ֆոնդերը: Գրքային հարուստ ֆոնդեր են Վ. Մավյանի, Վ. Հապեշյանի, Ս. Քոչարյանի, Համաստեղի եւ շատ այլ գրողների ու ավետագետների գրադարանները: Չափազանց հարուստ են հատկապես Թ. Ազատյանի, Ա. Չոպանյանի եւ Պոլսո հայոց պատրիարք Գ. Արսլանյանի գրքային ֆոնդերը, որոնք ընդգրկում են թե՛ հայերեն եւ թե՛ օտար լեզուներով հազարավոր գրքեր ու մամուլ. դրանց մեջ կան նաեւ մի շարք եզակի նմուշներ: Այսպես՝ Թ. Ազատյանի եւ Գ. Արսլանյանի ֆոնդերի միջոցով մեզ են հասել նշանավոր «Բյուզանդիոն», «Նոր օր», «Վերջին լուր» եւ «Բազմավեպ» պարբերականների ամբողջական հավաքածուները: Ֆոնդային գրադարանները հարուստ են ընծայագրերով գրքերով՝ ֆոնդատերերի ստացած կամ նվիրած: Այդ մակագրությունները հաճախ լույս են սփռում տվյալ գործիչների կենսագրության ու ստեղծագործական առնչությունների վրա:

Ակնարկում արդեն նշել ենք, որ ԳԱԹ-ի գրքային հարստության մասն են կազմում 500-ից ավելի հնատիպ գրքերը. հնատիպներով հատկապես հարուստ է Թ. Ազատյանի ֆոնդը:

Գրադարանում ի պահ է տրված հին ու նոր պարբերական մամուլի ավելի քան 30 000 նմուշ: Սրանից բացի՝ չափազանց մեծ թիվ են կազմում մամուլի էջերից հանված եւ անհատական փոքր ֆոնդերում պահվող բազմաթվա թվանդակությամբ հազարավոր մամուլի կտրոնները:

Վերջերս գրադարանը Վ. Մավյանի այրուց նվեր ստացավ Մավյանի անձնական գրադարանը, որտեղ առկա են շուրջ 60 հնատիպ գիրք եւ մամուլի եզակի նմուշներ:

Տեխնիկայի զարգացումն զգալի հնարավորություններ է տալիս նաեւ մշակութային արժեքների պահպանման ու տարածման համար: Վերջին տարիներին թանգարանում գործում է ֆոնդային նոր բաժին՝ տեսաձայնադարանը, որտեղ կենտրոնացված են ֆոնդերում առկա ձայնային ու տեսային բոլոր նյութերը: Ֆոնդային այս բաժնում պահպանվում են ձայնագրեր, ձայնակապակայաններ, կինոֆայլվեցներ, տեսաֆայլվեցներ, CD-ներ, DVD-ներ. 1000-ից ավելի նյութ: Արդի տեխնիկայի ընթացքն միջոցներով պահպանվող բեռնի նկատմամբ հնարավորինս վերամշակվում, վերաձայնագրվում ու թվանագրվում են, վերածվում նոր ֆորմատների: Տեխնիկական միջոցներով հավերժացել եւ սերունդներին են ի պահ տրվել մեր մեծերի ձայնն ու խոսքը: Արժեքավոր են հատկապես

մեծն Կոմիտասի եւ Ա. Շահմուրադյանի կատարումներով ծայնասկավառակները, դերասանական արվեստի հսկաներ Վ. Փափագյանի, Ի. Ալիխանյանի, Հ. Ներսիսյանի, Օ. Գուլագյանի, Գ. Գաբրիելյանի, Հասմիկի, Ա. Արմենյանի, Ա. Ոսկանյանի, Ս. Քոչարյանի եւ շատ ուրիշների դերակատարումների ու ասմունքային համարների ծայնագրությունները: Ժապավենների վրա ամրագրված եւ հավերժված են ի պահ հանձնված նաեւ մեր որոշ խորհրդահայ ու սփռուքահայ գրական մեծերի (Ա. Իսահակյան, Դ. Դեմիրճյան, Ջ. Եսայան, Ա. Չոպանյան, Պ. Սեւակ, Հ. Շիրազ, Հ. Մննուրի եւ այլք) տարբեր առիթներով ունեցած ելույթներն ու հարցազրույցները, մի շարք հայ կոմպոզիտորների ստեղծագործություններ: Բոլոր այդ նյութերն առանձնակի փայլ ու հմայք են տալիս թանգարանի տարաբնույթ միջոցառումներին եւ լավագույնս նպաստում նոր սերնդի գիտելիքների պաշարի հարստացմանն ու գեղարվեստական ճաշակի ձեւավորմանը:

Ինչպես վերն արդեն ասացինք, թանգարանին մշտապես արվել են բազմաթիվ նվիրատվություններ. հուրախություն հայ մշակույթի՝ մեր հոգեւոր տիրույթի որոշ մշակավոր գործիչներ հենց իրենք կամ էլ իրենց ժառանգներն ու այլ անձինք թանգարանին են հանձնել իրենց ամբողջական հավաքածուները կամ առանձին առարկաներ:

Այսօր էլ հայրենիքում ու արտերկրում որոշ հայ մեծերի ժառանգներ եւ այլ անձինք, հնարավոր է, ունենան մեր մշակույթի երախտավորների ձեռագրեր, անձնական իրեր եւ այլն: Սակայն տնային պայմանները, որպես կանոն, բավարար չեն մեծաց մասունքների պահպանման համար (ջերմաստիճան, խոնավություն, լույս եւ այլն), դրանք, հատկապես թղթե առարկաները, կարող են փչանալ, փտել եւ այլ կարգի վնասներ կրել կամ էլ անուշադրության մատնվել, հայտնվել պնայիսի մարդկանց ձեռքերում, որոնք գաղափար անգամ չունեն դրանց արժեքի մասին: Ցավոք, մեծն դեպքեր եղել են. Եկմայանի հարազատները, պատկերացում չունենալով մեծ երաժշտի վաստակի կարեւորության մասին, նրա ձեռագրերը հնոտիների հետ վաճառել են՝ հայ են համաշխարհային մշակույթը զրկելով, ամենեւին չի բացառվում, նույնիսկ մի շարք գլուխգործոցներից եւ Եկմայանի կյանքի ու գործի հետ կապված բազմաթիվ իրողություններ բացահայտելու հնարավոր



ությունից: Փրկվել են միայն այն նյութերը, որոնք եղել են նրա աշակերտների ձեռքում: Ուստի խոսքս թող հնչի որպես ահազանգ, որպես զգուշացում կոչ. եթե մեր մշակութային արժեքների բնօրինակները, մեր մեծերի մասունքները ձեռք չբերվեն այսօր, վաղը կարող են անհետանալ, կորսվել անդարձ:

Ցավով նշենք, որ Հայաստանի օրենսդրությունը մեծն դեպքերի համար (արտերկրի մեր հայրենակիցներին պատկանող արժեքավոր նմուշները Հայաստան տեղափոխելը) հստակեցված չէ, ինչը խոչընդոտներ է հարուցում նրանց առջև, ովքեր ցանկություն ունեն իրենց տանը պահվող թանգարանային առարկաները Հայաստան տեղափոխել: Այս խնդիրը, անշուշտ, պետք է հնարավորինս շուտ լուծում ստանա. հայ մշակույթի ու վերջինիս մեծ մշակների նշխարներն ու մասունքները պետք է անխոչընդոտ ու անարգել տեղափոխվեն Հայաստան, քանզի Մայր հայրենիքը՝ հայրենի հողում գտնվող թանգարաններն են դրանց վերջնահանգրվանը, որտեղ նրանք կբնակվեն լիակատար հոգաժության ու խնամքի, լիակատար պաշպանության եւ լիակատար ակնածանքի պայմաններում՝ տարբեր առաքելություններով ծառայելով մշակութաստեղծ հայ ժողովուրդի սերունդներին:

Հրաչյա ԲԱՆՈՅԱՆ (ԱՐՄԵՆՅԱՆ)
Բանասիրական գիտ. թեկնածու

ԱՅՐԻՎԱՆԷ (ԴԵՂԱՐԻՎԱՆԷ) ԵՒ ՄՈՒՐԻ ԴԵՂԱՐԻ

← էջ 3

Հետազայում նա հաստատվել է Կապադոկիայի Կեսարիա քաղաքում, ուր եւ նահատակվել է:

Գեղարդով Ամենասրբությանը՝ Հիսուսի սրտին էին հպվել, եւ այդ պահից գեղարդը դարձել է սրբազան մասունք, քանզի սրբությանը հավորդ ինքն էլ է սրբանում, ինչպես մկրտվողը, սուրբ ավագանի ջրով մաքրվելով, սրբվում է բոլոր մեղքերից ու կնքվում սուրբ մյուռնով:

Ավանդությունը հավաստում է, որ Հիսուսի տասներկու առաքյալներից երկուսը՝ Թադեոսն ու Բարդուղիմեոսը, եկել են Հայաստան ու քարոզել Աստծո խոսքը: Առաքյալների խոսքը հաստատվում էր բազմաթիվ հրաշագործություններով, որոնք իրականում էին իրենց բերած սրբությունների շնորհիվ: Թադեոս առաքյալն իր հետ բերել էր սուրբ գեղարդը, իսկ Բարդուղիմեոսը՝ սուրբ Տիրամոր պատկերը, որը Վասպուրականի Անձեւացիք կամ Անձեւացյաց գավառի Հոգյաց վանքին էր ի պահ տրվել: Ըստ Մովսես Խորենացու՝ Թադեոս առաքյալը, Տիրոջ գեղարդն իր հետ բերելով Հայաստան, քարոզում է Աբգար թագավորին ու արքունիքին, բժշկում տասներկու տարի անբուժելի բորոտության ախտից տառապող թագավորին:

Սանատրուկ թագավորի օրոք Թադեոս առաքյալն աստվածամուկ գեղարդով մեծանեւ հրաշքներ էր գործում ու չար ախտերով



տառապող հիվանդների բժշկում: Այդ ամենը տեսնելով ու լսելով՝ դարձի է գալիս նախ Սանատրուկի դուստրը՝ Սանդուխտ կույսը, ապա թագավորի քույրը՝ Ոգուհին: Հետագայում այս երկու կույսերը նահատակվում են Սանատրուկ թագավորի հրամանով:

Դրանից հետո երկար տարիներ սուրբ գեղարդը գտնվում էր Փոքր Հայքի Կամրջածորի վանքում, իսկ երբ սկսվում են սելջուկների ավերիչ ասպատակությունները, սուրբ գեղարդը խաչափայտի մի մասունքի հետ միասին դնում են կավե պոտոսկի մեջ ու թաքցնում հողի տակ: Անցնում է 177 տարի, եւ Կամրջածորի վանքում բնակվող մի այլազ-

ղաքական անբարենպաստ պայմանների եւ հատկապես մոնղոլ-թաթարական արշավանքների հետեւանքով ստեղծված անապահով դրության պատճառով անհրաժեշտություն է առաջանում սուրբ գեղարդը Ս. Էջմիածնից տեղափոխել ավելի ապահով թշնամու աչքից հեռու մի անկյուն: Այդպես սուրբ գեղարդը Պռոշ իշխանի ջանքերով 1260 թ. հայտնվում է Այրիվանքում, ուր պահվում է մոտ 500 տարի: Այդ ժամանակներից Այրիվանք-Գեղարդավանքը դառնում է հայ ժողովրդի ամենասիրած ուխտավայրերից մեկը:

Շարունակելի

Արման ՄԱՆՈՅԱՆ
Պատմական գիտ. թեկնածու

Վաթսուռականների արձակագիրներ. Ժամանակը եւ հերոսը

← էջ 6


Գյուղական իրականության մեջ գործող վիճակների ու հարաբերությունների մանրագնի ու հետետողական նկարագրությամբ Մաթեոսյանը կարողանում է ի հայտ բերել ժամանակակից կյանքի ներթափանցմամբ գյուղական կյանքով ապրող մարդկանց էության մեջ կատարվող տարբեր կարգի հոգեբանական տեղաշարժեր:

Գյուղը միայն միջավայր չէ, ուր կատարվում են գործողությունները. գյուղի առկայությունն սկզբունքային խնդիր է. էությունն այն է, որ այսօրվա մեր ջղային, նյարդային դարում, արագությունից, շարժումից ու թափից զուլիճ կորցրած, ճշգրիտ հաշվարկումների, մարդ-մեքենաների դարում, երբ ամեն ինչ մոլորվում է դեպի մանրացում, փոքրացում, հաշվարկում ու պլանավորում, մաքուր ծայրահեղ հավատարիմ մնալու հարցեր է արծարծում եւ ենթադրություններ, ամեն առիթով, բնության ձայնը, բնական վիճակը հակադրում քաղաքակրթության բերած եւ քաղաքակրթ թվացող արատավոր կողմերի միջամտությանը:

Այս տեսակետից ուղենշանային է «Գոմեշ» պատմվածքը: Մի ստեղծագործություն, որի մեջ վարար ու հորդուն եռքով նկարագրվում են բնության ազատ տարերքը, մաքուր ու կուսական բնության ձայնը: Գոմեշի մեջ արյունը տաք ու խելացնոր եռ է գալիս, եւ մա գնում է բեղմնավորվելու, գոմեշացուլ որոնելու: Հեղինակը խորանում է կյանքի հիմքերը կազմող վայրի, բնական ու նախնական բնագոյների ընդերքը: Այդ բնագոյներն ընկած են մարդու զգայությունների ու մտածումների հիմքում եւ իրենց ներքին շարժմամբ կարգավորում են կյանքը: Մի կողմից՝ բնական զգայությունների տարերք, որը, ըստ էության, սերն է, բնության ամենագործող ուժը, կեցության նախահիմքը կազմող մի զգացողություն, մյուս կողմից՝ քանոնով գծագրված ու միլիմետրերի ճշգրտությամբ հաշվարկված կյանքը, մի կողմից՝ բնության շնչառություն, սարերի, ծաղիկների, հովի ու հողի բուրմունք, մյուս կողմից՝ ասֆալտի ու կարբիտի գարշահոտ: Այս հակադրությունն իր հրաշալի ձեւակերպումն է գտել պատմվածքի մի հատվածում, ուր դեմ առ դեմ կանգնում են բնության նախնական ու ազատ տարերքը եւ քաղաքակրթության ստեղծած օրենքներն ու կարգ ու կանոնը: «Հարբած վիճակում հասարակության լուսամուտների տակ երգելու համար նկարիչ Ռուբեն Կոստանյանի գանգուրները միլիցիան խուզել էր եւ նրան չորս օրով տվել ասֆալտ եփող-մամլող հիմնարկին», — պատմում է հեղինակը եւ անմիջապես ձայնը տալիս իր հերոսին Ռուբեն Կոստանյանին. «Սրիկաներ, — ասֆալտը ճանկերով ասաց մա, — ստորներ, բռնադատիչներ... ինչո՞ւ ազատ են լեռան գոմեշը, թռչունը, քամին, թուփը, իսկ ես ազատ չեմ: Մամլակներ, ռոբոտներ, խորանարդներ, քառակուսիներ, ջարդող-կտրող-խուզող-ձեռողներ...»:

Այս ընդգծումը նորություն չէր «Գոմեշ» պատմվածքում: Այն իր նկատելիորեն խոր թաքնված արմատներն ունի մա եւ «Մենք ենք, մեր սարերը» վիպակում, ուր սարերի օրենքով մեծացած մարդիկ, բախվելով քաղաքակրթության որոշ կողմերի, բացալանում են. «Աշխարհը շինել եք հաշվապահություն»: Մի կողմից՝ վայրի ու ազատ լեռնականներ՝ իրենց «հովիվների հանրապետությամբ», մյուս կողմից՝ մանրուքների մեջ թաթախված կյանք ու դրանից ածանցված «հաշվապահություն»: Առաջինի կրողները Ջավեն Քոչարյանը, Իշխան Անտոնյանը, Պավեն, Ավագը եւ մյուս հովիվներն են,

իսկ երկրորդի՝ լեյտենանտ Հակոբյանը եւ հատկապես Ծառուկյանը: Լեյտենանտ Հակոբյանին հեղինակը դեռեւս արդարացնելու է. ներելու տեղ թողնում է, որովհետեւ մա նախ առաջարկում է կատարում եւ ապա, տեսնելով հովիվների ծանր աշխատանքը, կարող էր մա եւս ամաչել նրանց մոտ հարցաքննության գալու հանձնարարության համար: Իսկ ծաղրաբար Ծառուկյանը բոլոր տվյալներն ունի դառնալու իր տեսակի մեջ անկրկնելի մի տիպ: Խիստ ու անգիշում է հեղինակը մեր կյանքին հատկանշական այդ կարգի մարդկանց հանդեպ. «Եվ Ծառուկյանի գլխի փոքրության, եւ տնամերձի այդքան գուրգուրուտ վանդակավորման եւ այդ ներկի ու առանց փոթերի հագիվ իրար եկած վարագույրների մեջ մարդ տեսնում էր իր չնչինությունը»: Անմիջապես հետեւում է հակադրությունը. «Եվ այդ պահին էլ նրա սիրտը կարոտի պես ծակեց սերը դեպի իր լեռները՝ վերձի, կոշտուկոպիտ, միանգամից ձորն ընկնող անդունդներով ու միանգամից վեր սրվող ժայռերով, միանգամից շփշփացող անձրեւով եւ կայծակնորեն հանկարծակի վառվող արեգակով»: Լեռների օրենքներին ու բնության ձայներին վարժված մարդիկ՝ «հովիվների հանրապետության» ներկայացուցիչները, ունեն իրենց միտությունը, եւ նրանց ըմբռնումներին ու հարաբերություններին միանգամայն ավելորդ է հաշվապահական միջամտությունը: Այդ միջամտությունն ստեղծում է բախում հերոսների ըմբռնումներին ավելի մոտ կանգնած բնական օրենքների եւ կանոնագրքերում արձանագրված օրենքների միջեւ: Այդ մարդիկ կորցնում են իրենց ոտքի տակի հողը, որ իրենց հարաբերության, հարցերը լուծելու՝ ժամանակի ընթացքում մշակված սովորություններն են եւ քաշվում են այլ հարաբերությունների մեջ: Հեղինակի ընդգծումը բացահայտ է այդ միջամտության դեմ. այլ կերպ լինել չէր կարող: Կարեւորն այն չէ, թե ինչ վերջաբան է ունենում դիպաշարը: Կարեւորն այն է, որ իրենց գործը անհաշվեկատ առող մարդիկ դառ-



նում են հաշվեկատ, դառնում մի քիչ «հաշվապահ»:

Իսկ դա արդեն խարխուլում է նրանց կյանքի հիմքերը, քայքայում բնականորեն ձեւավորված հարաբերությունները եւ նետում այլ հարաբերությունների մեջ: «Հաշվապահությունը» գյուղացուն կտրում է հողից, մեռցնում է նրա մեջ գործին նվիրվածությունը, եւ բնության հարազատ որդին խորթանում է իր սարին ու քարին, օտարվում իր արմատներին, կտրվում ինքն իրենից, փորձում մոր հարաբերությունների մեջ գտնել իր տեղը եւ ճշտել իր կյանքի իմաստը: Իսկ այդ մոր հարաբերությունները կապվում են քաղաքակրթության կենտրոնների՝ քաղաքների հետ, ուր նրանք մինչեւ մոր կյանքի հունի մեջ մտնելը՝ մախ կորցնում են իրենց իրենց, անդեմանում եւ ապա իրենց ժառանգների շարունակությամբ հարմարվում մոր պայմաններին:

Շարունակելի

Դավիթ ԳԱՍՊԱՐՅԱՆ
Բանասիրական գիտ. դոկտոր, պրոֆեսոր

ԱԿՍԵԼ ԲԱԿՈՒՆՅԻ ՈԳԵՂԵՆ ՕՋԱԽՈՒՄ

← էջ 6

Խորհրդանշական է եւ այն իրողությունը, որ տուն-թանգարանին կից գործող գրական ակումբը մույնպես «Միրիադ» անունն ունի. հանրության համար պարբերաբար կազմակերպվում են գրական-երաժշտական միջոցառումներ, ըմբերցումներ, գրքերի շնորհանդեսներ, ավելի խորությամբ է ուսումնասիրվում Բակունցի գրական ժառանգությունը, անդրադարձումներ կատարվում Հայաստանի գրական եւ մշակութային կյանքին:


Իջնում ենք ներքնահարկ, որտեղ Բակունցի ընտանիքի մառանն է, հացատունը եւ խոհանոցը՝ մեծ թոնիրով, առաստաղից չորս լարով կախված դարս-դարս լավաշի տախտակամածով, հնաժողով, մեծ ու փոքր կնիւններով, կուժ ու կովայով, պղնձե, փայտյա եւ խեցեղեն կենցաղային իրերով: Այցելել եմ մա եւ Վահան Տերյանի եւ Հովհաննես Թումանյանի տուն-թանգարան դարձած հայրական օջախները: Զմարիտ է՝ բոլորն էլ հայկական-հայաշունչ են, սակայն առաջինում՝ Ջավախքին, մյուսում՝ Լոռուն, իսկ այստեղ Ջանգեզուրին բնորոշ իրերն ու կենցաղավարությունն են՝ նկատելի զանազանություններով: Եվ դա բնական է. չէ՞ որ Պատմահայր Խորենացու համար Հայաստանի ամեն երկրամաս մի... աշխարհ էր...

Հուշահամալիրի ուշագրավ մաս են բազալտյա ժանեկազարդ խաչքար-շատրվանը՝ ցայտաղբյուրով եւ ծառաբների վրա արված քանդակներով: Հատկանշական է, որ ժամանակին Ասեւ Բակունցի ձեռքով տնկված թթենին եւ երկու ընկուզենին, մոտ 80–90 տարի մարդկանց առատ պտուղներ շռայլելուց հետո, երբ ծերացան ու չորացան, գորիսեցի շնորհաշատ նկարիչ Ժիրայր Մարտիրոսյանը դրանց հաստաբուն բնափայտը կերպավորեց իբրեւ բակունցյան գրական հերոսներ՝ Սոմային («Միրիադ»), Արթին պապին («Նամակ ռուսաց թագավորին») եւ գրողի մայրիկին՝ զանգեզուրյան գլխակապով:

Քայլում ենք այգու բարձր ծառերի եւ վարդենիների միջով: Ուղեքս գետնին եւ դնում մի տեսակ երկյուղածորեն, ավելի հուզումնալի... ախր ուրիշ խորհուրդ ունի այս այգին, ուր մեծն Բակունցի հեռավոր ոտնաձեռքերն են... Այգին փթում է կամաշ շնչով ու արեւահամ պտուղներ տալիս: Թանգարանի տնօրենին խնդրում եմ ցույց տալ բաղադրանքի այն ծառը, որի զովասուն սաղարթների սովորում փռված կարպետների ու գորգերի վրա հանգստացել է Բակունցը, պարապել ժամերով ու գրել, հաճախ էլ խնջույքներ արել: Ահավասիկ հիշատակման արժանի մի քանի պերճախոս տողեր Մ. Ասլամազյանի «Կյանքիս դավթար»-ից.

«Մի անգամ Գիշուկ (Բակունցի փոքր եղբայրը. — Մ. Ա.) եկավ մեզ մոտ սովորականից շուտ: Ակսելն էր ասել, որ թողնեմք ամեն ինչ եւ շտապենք նրա մոտ: Բակունցի ընտանիքը զարմացած. չորս կողմը հյուրեր: Սեղանի գլխամասում Ակսելն էր. մա թամաղա էր: Մտեցավ մեզ եւ ասաց. «Ես կատարում եմ Շիրվանի պատգամը: Նա ինձ պարտավորեցրել է, որ իր մահվան օրը մեծ սեղան գցեմ, հրավիրեմ նրան, ում ես կցանկանամ, ինքս լինեմ թամաղա, ու քե՛ք անենք եւ հիշենք նրան առանց տխուր խոսքերի՝ որպես ընկերոջ եւ գրող Ալեքսանդր Շիրվանզադեի: Այսօր առավոտյան ես հեռագիր ստացա եւ հիմա կատարում եմ հանգուցյալի կամքը»: Այդ երեկո Ակսելն ավելի սրամիտ ու նրբախոս էր, երկար պատմում էր իր ու Շիրվանի հանդիպումների եւ արկածների մասին»:

Վ. Սարգսյանն ասաց, որ, ցավոք սրտի, այլեւս չկա այդ «պատմական» տանձենին, սակայն «մի հուսադրող փաստ. մախկին ծառի դեռեւս կենսունակ արմատից ահա այս դալար շիվն է աճում, եւ մենք հատուկ խնամք կտանենք, որ աճի, կրկին մեծ տանձենի դառնա»: Ձեռնահաս տնօրենը տնկարան է հիմնել, որով շարունակաբար կազմակերպում, կերտասարդացնի այս մշամավոր այգին: (Ես էլ, ի դեպ, խոստացա Աշտարա-



Գործ՝ Էր. Խաթեկյանի

կի իմ այգուց այստեղ հասցնել արտասովոր խոշոր պտուղներ տվող ընկուզենու տունկ, որի «հայրը», ասում են, սերում է Հնդկաստանի նախկին պրեմիեր-մինիստր Ինդիրա Գանդիի նստավայրի այգուց...):

Արեւը դեպի մայրամուտ է թեքվում: Ես տուն-թանգարանին եմ հանձնում բերածս նկարը: Հանձնել անակնկալ կար. պարզվեց՝ Վարդան Սարգսյանն արձակագիր է, եւ մա ջերմ ընծայագրով ինձ նվիրեց վերջերս Ստեփանակերտում լույս տեսած իր «Երկաթե թիթեղիկների մեղեդին» պատմվածքների գիրքը:

Այգու տաղավարում եղավ հյուրասիրություն: Թարմ լավաշ, ընկույզ ու ծաղկաբույր մեղր, մրգեր... Հյուրերը խնձորների «հեղինակն» էլ է Բակունցը: 1920-ականների կեսին գյուղատնտես Ալեքսանդր Բակունցի ներմուծած ծառերի «ժառանգներից են», որոնք պատվաստի եղանակով վաղուց ի վեր տարածվել են Գորիսում եւ շրջակայքում:

Թե՛ն մատուցում Բակունցի ընտանիքի մեծ ինքնատեղի: Բուրավետ է, քանզի Գոսան Աշոտի գովերգած «Ծաղկավառ Ջանգեզուրի հազար տեսակ վարդերից» ու լեռնային թեյախոտերից է «առել սնունդ»:

Ես շնորհակալություն եմ հայտնում եւ հրաժեշտ տալիս մեծն Ակսել Բակունցի հիշատակը վառ պահող նվիրյալ աշխատակազմին: Հրաժեշտ եմ տալիս եւ Ակսել Բակունցի մորթոյա ոգեղեն, հայաշունչ օջախին ու բռնում վերադարձի ճանապարհը:

Քաղաքի կենտրոնում Բակունցի տպավորիչ հուշարձանն է՝ բաց գիրքը ձեռքին, քարեղեն անքթիթ հայացքը հարազատ ծննդավայրին: Գիշեր ու գոր մա իր շողշողուն Գորիսի բարգավաճումն է լռիմ տեսնում, քաղաք, որին երախտավոր զավակը յուրօրինակ գրական հուշարձան նվիրեց՝ անկրկնելի «Կյորես»-ը:

Սերժ ՄԱՆՈՒԿՅԱՆ

ՔՐԻՍՏՈՆՅԱՆ ՀԱՅԱՍՏԱՆ

Կրոնական, մշակութային,
լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»
թերթի խմբագրություն

Գլխավոր խմբագիր՝

Աստղիկ Ստամբուլյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝ qristhay@etchmiadzin.am

astghikstam@gmail.com

web կայք՝

krishayas.wordpress.com

Ստոր. տպագր. 15.09.2021 թ.

Տպաքանակը՝ 1225